

VENDIM
Nr. 119, datë 21.7.2016

PËR MIRATIMIN E “RREGULLORES SË PROCEDURAVE TË TRANSFERIMIT TË ASETEVE NGA TË LICENCUARIT”

Në mbështetje të neneve 16; 44, pika 2 dhe 108, pika 3, të ligjit nr. 43/2015, “Për sektorin e energjisë elektrike”, si dhe neneve 29, pika 2; 116, pika 4, të ligjit nr. 102/2015, “Për sektorin e gazit natyror”, dhe nenit 26, të “Rregullores për organizimin, funksionimin dhe procedurat e ERE-s”, miratuar me vendimin Bordit të ERE-s nr. 96, datë 17.6.2016, Bordi i ERE-s, në mbledhjen e tij të datës 21.7.2016, mbasi shqyrtoi relacionin e përgatitur nga drejtoritë teknike,

VENDOSI:

1. Të miratojë “Rregulloren e procedurave të transferimit të aseteve nga të licencuarit” (rregullorja bashkëlidhur këtij vendimi).

2. Drejtoria Juridike dhe Mbrojtjes së Konsu-matorit të njoftojë palët e interesuara për vendimin e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti

RREGULLORE
E PROCEDURAVE TË TRANSFERIMIT TË ASETEVE NGA TË LICENCUARIT

PJESA E PARË
DISPOZITA TË PËRGJITHSHME

Neni 1

Autoriteti

Kjo rregullore hartohet në zbatim të nenit 44, të ligjit nr. 43/2015, “Për sektorin e energjisë elektrike”, nenit 29, të ligjit nr. 102/2015, “Për sektorin e gazit natyror” dhe në zbatim të vendimeve të Bordit të ERE-s, për miratimin e licencave në sektorin e energjisë elektrike, gazit natyror dhe në përputhje me “Rregulloren e organizimit, funksionimit dhe procedurave të ERE-s”, miratuar me vendimin nr. 96, datë 17.6.2016.

Neni 2

Qëllimi

Qëllimi i kësaj rregulloreje është të përcaktojë procedurën dhe dokumentet e nevojshme për miratimin e kërkesave të të licencuarve, të cilët paraqesin në ERE kërkesën, për:

a) shitje, dhënie me qira, transferim, hipotekim, barrë ose çfarëdolloj disponimi tjetër të pajisjeve ose aseteve fikse të të licencuarit, të përdorura për kryerjen e veprimtarisë së prodhimit, transmetimit, shpërndarjes së energjisë elektrike

b) shitje, dhënie me qira, transferim, hipotekim, barrë ose çfarëdolloj disponimi tjetër të pajisjeve ose aseteve fikse të të licencuarit, të përdorura për kryerjen e veprimtarive të transmetimit, shpërndarjes dhe operimit të GNL-së ose depozitave të gazit natyror.

Neni 3

Objekti

Kjo rregullore përcakton procedurat që aplikohen nga ERE, si dhe parimet për shqyrtimin e çdo kërkesë për shitje, dhënie me qira, transferim, hipotekim, barrë ose çfarëdolloj disponimi tjetër të pajisjeve ose aseteve fikse të të licencuarit sipas ligjit nr. 43/2015, “Për sektorin e

energjisë elektrike” dhe sipas ligjit nr. 102/2015, “Për sektorin e gazit natyror”.

Neni 4 **Zbatimi**

a) Kjo rregullore do të zbatohet për të gjithë të licencuarit në sektorin e energjisë elektrike dhe të gazit natyror, të cilët kërkojnë të transferojnë asetet e prodhimit, transmetimit ose shpërndarjes, sipas përcaktimeve të ligjeve respektive.

b) Për transferimin e aseteve të të licencuarve me kapacitet të instaluar nën 1 mw, nuk ka nevojë për miratimin e ERE-s. Për të gjithë të licencuarit e tjerë do të kërkohet miratimi i ERE-s për transferim të aseteve, kur vlera e asetit që kërkohet të transferohet është më e madhe se 1.50.000.000 lekë (njëqind e pesëdhjetë milionë).

c) Për transferimin e aseteve të të licencuarve që operojnë një linjë direkte në sektorin e gazit natyror, nuk ka nevojë për miratimin e ERE-s.

d) Për transferimin e aseteve me vlerë totale më të vogël se 1.50.000.000 lekë (njëqind e pesëdhjetë milionë) apo aseteve që nuk lidhen ngushtësisht me veprimtarinë e licencuar, nuk është i nevojshëm miratimin i ERE-s.

e) Për transferimin e aseteve që realizohet në kuadër të procesit të privatizimeve në sektorin publik nuk do të aplikohet kjo rregullore.

f) Kërkesa për transferim biznesi nga të licencuarit do të rregullohet sipas legjislacionit përkatës në fuqi.

g) Për HEC-et me fuqi të instaluar më të vogël se 5 mw, kërkohet miratimi i ERE-s nëse vlera e aseteve që transferohen është më e madhe se 50.000.000 lekë (pesëdhjetë milionë).

Neni 5 **Përkufizime**

Fjalët dhe frazat e mëposhtme të përdorura në këtë rregullore do të kenë kuptimet e mëposhtme:

a) “Ligji për energjinë” do të thotë ligji nr. 43/2015, “Për sektorin e energjisë elektrike”.

b) “Ligji për gazin natyror” do të thotë ligji nr. 102/2015, “Për sektorin e gazit natyror”.

c) “Bordi i ERE-s” do të thotë organi ven-dimarrës i ERE-s, i përbërë nga pesë anëtarë të emëruar sipas procedurave të parashikuara nga ligji nr. 43/2015, “Për sektorin e energjisë elektrike”

d) “ERE” do të thotë autoriteti rregullator i sektorit të energjisë elektrike dhe të gazit natyror, i cili funksionon në përputhje me ligjin 43/2015, “Për sektorin e energjisë elektrike” dhe ligjin nr. 102/2015, “Për sektorin e gazit natyror”.

e) “Licencë” është një e drejtë që i jepet një personi për ushtrimin e një veprimtarie në sektorin e energjisë elektrike dhe gazit natyror, në përputhje me dispozitat e ligjit të energjisë dhe ligjit të gazit natyror.

f) “I licencuar” do të thotë një person i cili gëzon të drejtën dhe është i pajisur me licencë për ushtrimin e një veprimtarie në sektorin e energjisë elektrike apo të gazit natyror në përputhje me dispozitat e ligjit nr. 43/2015, “Për sektorin e energjisë elektrike” dhe ligjin nr. 102/2015, “Për sektorin e gazit natyror”.

g) “Procedurë” do të thotë tërësia e veprimeve që kryhen për zbatimin e legjislacionit në fuqi.

h) “Aset” do të thotë aktivi afatgjatë material që trajtohet nga i licencuari dhe që i shërben realizimit të një prej aktiviteteve të licencuara në sektorin e energjisë elektrike apo të gazit natyror nga ERE.

i) “Ditë” do të thotë ditë kalendarike.

j) Transferim asetesh do të thotë çdo veprim me anë të të cilit krijohet një marrëdhënie shitjeje, dhënieje me qira, transferimi, hipotekimi, barre ose çfarëdolloj disponimi tjetër të pajisjeve ose aseteve fikse të të licencuarit që i shërbejnë veprimtarisë së licencuar.

k) “Biznes” do të thotë aktiviteti i licencuar nga ERE, për:

- i) kryerjen e veprimtarisë së prodhimit, transmetimit, shpërndarjes së energjisë elektrike;
- ii) kryerjen e veprimtarive të transmetimit, shpërndarjes dhe operimit të GNL-së ose depozitave të gazit natyror.

PJESA E DYTË PROCEDURAT E PARAQITJES SË NJË KËRKESË PËR TRANSFERIM ASETESH

Neni 6

Propozimi për fillimin e një procedure për transferim asetesh

Një procedurë për transferim asetesh fillon me paraqitjen nga një person mbajtës i një licence të dhënë nga ERE, të një kërkesë për shitje, dhënie me qira, transferim, hipotekim, barrë ose çfarëdolloj disponimi tjetër të pajisjeve ose asetëve fikse të të licencuarit që i shërbejnë veprimtarisë së licencuar.

Neni 7

Përmbajtja e kërkesës për transferim

Çdo i licencuar që paraqet në ERE kërkesën për transferim asetesh duhet të përfshijë në kërkesën e tij, në mënyrën dhe formën e kërkuar nga kjo rregullore, informacionin si më poshtë:

1. Një përshkrim të të licencuarit që përmban informacion, mbi:
 - a) një ekstrakt historik të shoqërisë tregtare të të licencuarit, të lëshuar jo më vonë se 3 muaj nga data e aplikimit;
 - b) veprimtarinë e licencuar;
 - c) gjendjen financiare të kompanisë në kohën që paraqet kërkesën dhe efektin e pritshëm pas miratimit të transferimit të asetëve;
 - d) një përshkrim të kandidatit të propozuar për transferim aset, që përfshin informacion të përgjithshëm mbi veprimtarinë e shoqërisë që përfshihet në transaksion të tri viteve të fundit dhe të vitit të fundit, kur shoqëria ka më pak se 3 vjet që është krijuar, gjendjen financiare;
 - e) arsyet e kërkesës për kryerjen e transferimit;
 - f) efektet e pritshme të transferimit në aktivitetin e të licencuarit;
 - g) efekti në furnizimin e rregullt e të qëndrueshëm të klientëve të të licencuarit dhe në tarifat e aktivitetit të licencuar;
 - h) marrëveshje paraprake e nënshkruar midis palëve në një nga format e parashikuara nga ligji, për transferimin e asetëve. Marrëveshja duhet të përmbajë një listë të detajuar të asetëve që kërkohet të transferohen;
 - i) deklaratë me shkrim e personit tek i cili është propozuar të bëhet transferimi, ku të shprehë gatishmërinë e tij për të garantuar vetë apo me palë të tjera veprimtarinë e licencuar pas kryerjes së transferimit;
 - j) nëse ka pasur listën e transferimeve të kryera më herët nga i njëjti subjekt.
2. Me transferimin e asetëve të personi që i përfiton, në kushtet e mospërmbushjes së detyrimeve të marrëveshjes, licenca e subjektit që ka transferuar asetet, bëhet e pavlefshme për pjesën e asetëve që transferohen.
3. Subjektet koncesionare të licencuara, të cilat aplikojnë për miratimin e transferimit të asetëve në ERE, duhet të shprehin në formë të shkruar në marrëveshjen e transferimit të asetëve, detyrimet me të cilat ngarkohen për shkak të marrëveshjes së koncesionit e pjesët që transferojnë të përfituesi. Kjo përfshin edhe informimin e autoritetit shtetëror, në lidhje me qëllimin e transferimit të asetëve.
4. Kërkesa, informacioni dhe dokumentacioni i bashkëlidhur kërkesës, duhet të jenë të nënshkruar nga personi ose personat e autorizuar nga shoqëria, që kanë kompetencën për përfaqësimin e personit, mbajtës licence apo të kandidatit të propozuar.

5. Nëse Bordi i ERE-s gjykon të nevojshme, mund të kërkojë informacion shtesë nga i licencuari, i cili duhet ta dërgojë informacionin e kërkuar brenda 8 ditëve nga marrja e njoftimit.

6. Pjesë të dokumentacionit që i licencuari kërkon të mos jenë të hapura për publikim, duhet të specifikohen në kërkesën për transferim, së bashku me arsyet e mosbërjes publike të tyre.

Neni 8

Fillimi i shqyrtimit të kërkesës

Pasi shqyrton kërkesën e paraqitur nga subjekti i licencuar në lidhje me transferimin e aseteve, Bordi i ERE-s shprehhet me vendim për fillimin ose jo të procedurave, sipas “Rregullave të praktikës dhe procedurave të ERE-s” dhe kësaj rregulloreje.

Neni 9

Verifikimi i dokumentacionit dhe informacioni shtesë

1. Bordi i ERE-s mund të ngarkojë një ose më shumë persona për verifikimin e vërtetësisë së të dhënave të paraqitura nga i licencuari, duke bërë inspektimin në vend.

2. ERE mund të kërkojë nga i licencuari çdo informacion apo dokumentacion shtesë që mund t'i shërbejë vendimarrjes së Bordit për pranimin ose jo të kërkesës së transferimit të aseteve.

Neni 10

Afati i shqyrtimit të kërkesës

1. Shqyrtimi i kërkesës për transferimin e aseteve, nëse i licencuari ka plotësuar tërësisht informacionin dhe dokumentacionin e kërkuar, do të bëhet brenda 45 ditëve pune nga marrja e vendimit për fillimin e procedurave të shqyrtimit.

2. Në rast se dokumentacioni nuk është dërguar konform nenit 7, por është marrë vendim për fillimin e procedurave të shqyrtimit, afati i përcaktuar në pikën 1 të këtij neni do të fillojë nga dita e paraqitjes së plotë të dokumentacionit të kërkuar nga ERE. Nëse, pas marrjes së vendimit, informacioni nuk dërgohet brenda 2 muajve, atëherë vendimi për fillimin e procedurave e humbet fuqinë juridike dhe i licencuari do të paraqesë një kërkesë të re në ERE.

3. Në rastin e transferimit të aseteve nga shoqëria e prodhimit të energjisë elektrike me kapacitet më të madh se 10 mw apo nga centralët në sektorin e gazit me vlerë më të madhe se 2.000.000.000 lekë, afati i përcaktuar në pikën 1 të këtij neni është 60 ditë.

Neni 11

Parimet për miratimin e kërkesës për transferim

1. Pas skadimit të afatit të përcaktuar në nenin 7 të kësaj rregulloreje, Bordi i ERE-s do të marrë vendim për miratimin ose refuzimin e kërkesës për transferim, duke e bazuar vendimin e tij në parimet dhe kriteret si më poshtë:

- a) dëmtimi i interesave publike nga transferimi;
- b) gatishmëria e personit tek i cili është propozuar të bëhet transferimi për të vazhduar veprimtarinë e licencuar pas kryerjes së transferimit;
- c) ndikimi i transferimit në gjendjen financiare të të licencuarit, si dhe të personit të propozuar për ndryshim (mban në të njëjtin nivel, përmirëson apo përkeqëson gjendjen financiare);
- d) ndikimi i transferimit në përmirësimin e cilësisë së shërbimit të aktivitetit të licencuar;
- e) ndikimi i transferimit në tarifat e shërbimit për klientët tariforë dhe ndikimi në përfitimet për ata;
- f) ndikimi i transferimit në ekonominë e komunitetit, në rastin e kompanive publike;
- g) mundësia financiare dhe teknike e personit të propozuar për transferim, për të vazhduar operimin e aseteve dhe kryerjen e riparimeve të tyre, nëse janë të nevojshme;
- h) mundësinë e personit të propozuar për transferim për të mbuluar efektin financiar në rritjen e tarifave që mund të shkaktohet nga transferimi i aseteve.

Neni 12

Njoftimi për vendimin

1. Në përfundim të procedurës për transferim aset, brenda 5 ditëve pune, ERE do të njoftojë të licencuarin mbi vendimin e Bordit, si dhe do t'i dërgojë atij një kopje të vendimit. Një kopje e vendimit i shkon edhe autoritetit shtetëror përgjegjës, në rastin e transferimit të aseteve të një subjekti koncesionar.

2. Vendimi i Bordit të ERE-s për kërkesën për transferim asetesh do të publikohet në Fletoren Zyrtare.

Neni 13

Ankimi gjyqësor

Kundër vendimit të Bordit të ERE-s për miratimin apo refuzimin e transferimit të aseteve, mund të bëhet ankim në gjykatë brenda 30 ditëve nga botimi i vendimit në Fletoren Zyrtare.

PJESA E TRETË
DISPOZITA TË FUNDIT

Neni 14

Amendamente të rregullores

Këto rregulla janë objekt rishikimi dhe ndryshimi me vendim të Bordit të ERE-s, në përputhje me “Rregulloren e organizimit, funksionimit dhe procedurave të ERE-s”.

Neni 15

Hyrja në fuqi

Kjo rregullore hyn në fuqi menjëherë dhe botohet në Fletoren Zyrtare.